

摘藻堂四庫全書薈要

集部

欽定四庫全書蒼要卷一萬八千四百四

集部

御選金詩卷十八

七言絕句一

蔡松年

步尋野卉

風煙草木照人明
神藥奇花問識名
聞道東州有仙窟
欲尋根撥學長生

癸丑歲秋郊

漫漫黃雲水清淺碧花無處亂鳴蜚此生愈覺田園樂
夢裏曉山三四峰

入關宿昌平

黃塵却送入關山自斲何如二頃田記得鳴蜚碧花句
蹉跎秋思又三年

秋日

風螢開闔度松陰松下飄然倦客心幾點清光照涼夜
何時遠寺得幽尋

高麗館中二首

蛤蜊風味解朝醒
松頂雲凝雨不晴
悄悄重簾斷人語
碧壺春筍更同傾

晚風高樹一襟清
人與縹緲相照明
謝女微吟有深致
海山星月總關情

西京道中

來時綠水稻如鍼
歸日青梢沒鶴深
莫忘共山買田約
藕花相間柳陰陰

銀州道中

小渡霜螯賤於土重巖野菊大如錢此時最憶涪翁語
無酒令人意缺然

高昌館道中

雨餘巖石古苔青松裏珠璣萬葉明渺渺綠畦看鷺立
深深清樾有蟬鳴

黃海棠

輕如紅豆排冰雪一拂新鶯色更奇不覺濃陰破明玉

有情誰解賞離披

梅花

的皪橫枝愛老崔
一尊長對畫圖開
此生端有梅花分
閒送春風入手來

吳激

山中見桃花李花

錦里春風徧海棠
別時無計奈紅芳
山中桃李渾疑晚
猶有殘花斷客腸

宿湖城薄廳

日遲風暖燕飛飛
古柳高槐面翠微
卷上疎簾無一事
滿池春水照薔薇

偶成二首

一番瘦筍羽林槍
松架陰陰盡日涼
繞屋雲煙無定態
連山草木有真香

蟹湯兔盞鬪旗槍
風雨中枕簟涼學道窮年何所得
只工埽地與焚香

秋興

後園雜樹入雲高
萬里長風夜怒號
憶向錢塘江上寺
松窗竹閣瞰秋濤

張戡北騎

張生鞍馬客幽都
却笑靈光筆法麤
祇今白首風沙裏
憶向江南見畫圖

題宗之家初序瀟湘圖

江南春水碧於酒
客子往來船是家
忽見畫圖疑是夢

而今鞍馬老風沙

王樞

三河道中

十載歸來對故山
山光依舊白雲閒
不須更讀元通偈
始信人間是夢間

邢具瞻

出塞

樓外青山半夕陽
寒鴉翻墨點林霜
平沙細草三千里

一笛西風人斷腸

王繪

江天秋晚圖

萬頃波間踏浪兒
瀟湘秋晚趁歸時
四山紅葉風聲健
散入農家欸乃詞

宇文虛中

燈碑五首

清陰靄靄匝城闌
萬井熙熙桃李春
紫陌傳呼旌旆出

重臣新佩玉騏驎

鈿軸天章拜異恩
驂驔花騎映朝暉
手持禁鑰千門肅
官壓東宮二品尊

壘原清照白登山
彌隴連天麥浪寒
劒戟漸銷農器出
人家只識勸農官

九夏南風入舜琴
恩風澤雨浹飛沈
陪京最是儀型地
先識君王解愠心

枹鼓無聲訟獄空
懽謠擊壤萬家同
時人共解班春意

兵寢刑清第一功

館中書事

雨來蒸鬱似江鄉
雨過西風特地涼
尚有庭花共客恨
可無尊酒慰幽芳

春日

北洹春事休嗟晚
三月尚寒花信風
遙憶東吳此時節
滿江鴨綠弄殘紅

醉經齋

傍人但笑腹便便枕藉詩書正晝眠不識先生真悟處
未離文字已逃禪

醉墨齋

旋汲清泉起縠紋定知婁永是前身箇中自可逃真性
不用淋漓汙葛巾

高士談

棣棠

閒亭隨分占年芳裊裊青枝淡淡香流落孤臣那忍看

十分深似御袍黃

雪

簌簌天花落未休
寒梅踈竹共風流
江山一色三千里
酒力消時正倚樓

苦竹

密葉修莖雨後新
肯因憔悴損天真
清如南國紉蘭客
瘦似西山採蕨人

睡起

平生心性樂疎慵
多病追歡興亦空
睡起不知春已老
一簾紅雨杏花風

楊花

來時官柳萬絲黃
去日飛毬滿路傍
我比楊花更飄蕩
楊花只是一春忙

道中

鳴鳩逐婦婦欲去
燕子引雛雛不來
樹底樹頭千點雨
山南山北一聲雷

二月十一日見桃花

鳴鳩天色半陰晴
竹屋松窗老寸心
閉戶不知春早晚
桃花紅淺柳青深

邊元勳

望瀛臺春望

晴雲如困柳如癡
丹杏開殘碧草齊
一派望瀛臺下水
暖風遲日浴鳬鷺

七夕

高樓人散酒樽空
漫擬新文送五窮
獨倚南窗夜沈寂
一鈎涼月下疎桐

邊元鼎

夢斷

繡枕紅衾晚意濃
啼鶯大似不相容
夢魂苦恨歸來早
不盡瀛州第一峰

花開人散二首

花開人散正消魂
花語無情獨閉門
看即春光留不住

一聲啼鴂又黃昏

閒花閒草滿芳洲
春水無人自在流
白日遲遲倦遊子
一聲啼鳥一聲愁

聞笛

雌鷺無鳳怨西風
月女愁寒淚灑空
牙板急隨聲不斷
滿天敲碎玉玲瓏

閱見一十首

君居淄右妾河陽
平白相逢惹斷腸
蠟燭已殘歌欲闕

并教離恨繞飛梁

蕭史吹笙鳳女臺
月高霜冷鳳笙哀
不堪好酒沈沈夜
又遣青鸞獨自來

鳳紙銜封玉鏡臺
繡鸞傳記已相猜
傾城笑臉千金樣
莫對閒人一例開

歌裏冲冲笑裏嗔
深情會處幾何人
憑君為向五陵道
冶葉昌條不是春

笑裏低眉引醉波
閨風秋月一聲歌
明知畫燭無情物

何事樽前淚更多

笑不成歡歌歛眉景陽鐘動酒闌時此情却羨牽牛會
一歲相過可是遲

牛女佳期歲一過都緣迢遞隔銀河可憐馬上香車畔
只隔珠簾更不多

輕蓮素質澹蕭蕭葉密溪深未可招雨暗蘭舟人去後
却容白鷺逞風標

雙鸞夾鏡鳳橫釵捧額黃梅小鴈排為報阿環休調戲

雙成西母總相猜

膩髮堆雲鏡舞鸞五雲仙洞接清歡歸來失却吹簫伴
腸斷崑山昨夜寒

張斛

將渡江

無數飛花委路塵不堪重醉楚城春明朝回首江南岸
煙雨昏昏不見人

武陵春雪

天風吹雪滿千山不見桃花汎碧瀾洞裏仙人貪種玉
豈知人世有春寒

劉豫

雜詩六首

竹塢人家瀕小溪數枝紅杏出疎籬門前山色帶煙重
幽鳥一聲春日遲

風荷柄柄弄清香輕薄沙禽落又翔紅日轉西漁艇散
一川山影暮天涼

古渡停驂日向沈淒涼歸思梗清吟碧山幾點塞天闊
紅葉一林秋意深

倚巖蕭寺寄危崖丈室軒窗面水開雪霽暮寒山月上
數竿脩竹一枝梅

畫色晴明著色圖山光凝翠接平湖煙嵐自古人難畫
遠即深深近却無

寒林煙重暝棲鴉遠寺疎鐘送落霞無限嶺雲遮不斷
數聲和月到山家

客館

雪消北嶺安排暖
寒入東風阻節春
絕塞亂山圍古驛
他時說著也愁人

馬定國

過李湘

數樹高槐散乳鴉
時於缺處見黃花
涼風不斷如流水
相對胡床坐日斜

雪

紅樓翠瓦不禁寒
欲剪梅花去路難
淨埽竹亭聊飲酒
恰如明月照金盤

雪霽

高巖旭日吐深頰
雪霽樓臺白玉京
獨住南塘探春色
枇杷花下竹雞聲

寒食

燕泥半落烏衣巷
柳色全添綠綺窓
且伴丁香過寒食
弄晴蝴蝶一雙雙

楊休烈邨居

籬落牽牛放晚花
西風吹葉滿人家
閉門久雨青苔滑
時見鴛鴦下白沙

游何氏園

八尺龍蛇薜荔牆
瘦松疎竹更蒼涼
梅花映水無人見
隔岸飛來片片香

香巖病中

九州四海盡行路
萬戶千門非我家
金彈不徒驚燕雀

春雷終待起龍蛇

郢州城西

秋江白水浪花麤
墟落人歸鳥自呼
新月高城三百雉
角聲吹徹小單于

秋日書事

井邊薏苡吐秋珠
舍下瓜區雜芋區
世道未夷聊小隱
不須辛苦著潛夫

邨居五首

溪頭梅是去年花
閒日初長
逕竹斜向晚
孤煙三十里
不知樵唱落誰家

蠶蛹成蛾桑柘稀
海棠花發照窗扉
離騷讀罷無人會
獨立溪南看夕暉

五月南風化蟪蛄
野塘晚筍未成蒲
櫻花落盡紅英細
沙渚鴛鴦半引雛

柿葉經霜菊在溪
天寒落日見雞棲
西家有客菊新酒
紅葉蕭蕭蓋芋畦

歲暮行人竟不來
空吟溪樹覓寒梅
何時消盡關山雪
收拾春風入酒杯

祝簡

下第魚臺東寺

病眼逢花亦倦開
流鶯飛去誤相猜
多情却愛僧堂燕
才得春風却再來

雜詩二首

雨後清寒滿袖風
鴈聲南去暮雲濃
秋來杞菊能多少

欲助盤餐自不供

榴花嬌欲鬪羅裙
石竹開成碎纈文
更有戎葵亦堪愛
日烘紅臉酒初醺

虛極齋獨坐

虛齋長鋏短燈檠
明月當窗夜氣清
却掩塵編時閉目
胡床獨坐聽秋聲

相國寺鐘

寒雞縮頸未鳴晨
已聽春容入夢頻
未必佛徒知警悟

祇能喚起利名人

春日

鶯語相喧浩蕩春
落花細點禁街塵
游絲飛絮狂隨馬
遲日和風欲醉人

夏雨

雷掣雷轟雨覆盆
晚來枕簟頗宜人
小溝一夜水三尺
便有蛙聲喧四鄰

和常祖命二首

著書不得自名家卷裏蠅頭散眼花未用一杯張翰酒
正須七碗玉川茶

操筆文章學古風平生羞與腐儒同相如雖有凌雲賦
不及東方射守宮

撿旱

草樹連雲綠間黃年饑邨落自荒涼晚蟬抱樹聲聲急
野菊迎人細細香

王景微

贈定國

澗下松杉已蔽牛溪中蘋藻可供羞故鄉未有終年計
欲指吳山歸去休

朱之才

宿閑廐

澹煙衰草慵回首晚日殘霞欲斷魂脫帽卸鞍投逆旅
蕭蕭黃葉水邊邨

杜佺

馬嵬道中

垂柳陰陰水拍堤
春晴茅屋燕爭泥
海棠正好東風惡
狼籍殘紅送馬蹄

劉著

閨情二絕

天邊北斗又回春
愁絕龍沙任酒醺
萬里巫山歸夢斷
不知何處覓行雲

蕙帳金爐冷篆煙
故山春草幾芊芊
只今惟有瀟湘月

萬里相隨照不眠

過白溝赴順安

萬折狂瀾肯倒流
歸心夢寐在東周
平生快意君知否
今日驅車過白溝

題御城寺壁

一徑埋雲草樹荒
石麟蒼鮮卧田桑
漢家陵闕今何在
洛水嵩山滿夕陽

病中寄楚卿

月滿江樓午夜鐘多情多病一衰翁行雲不道無行雨
只恐相逢是夢中

送客亭

十年羈旅鬢成絲千里淮山信息稀送盡長亭短亭客
且看莊舄幾時歸

伯堅惠新茶綠橘香味郁然便如一到江湖之
上戲作小詩二首

連溪玉餅號無雙雙井為奴日鑄降忽聽松風翻蟹眼

却疑春雪落寒江

黃芑猶帶洞庭霜
翠袖傳看綠葉香
何待封題三百顆
只今詩思滿江鄉

王競

奉使江左讀同官蕭顯之西湖行記因題其後
雲煙濃淡費臨摹
行記看來即畫圖
雲夢不妨吞八九
筆頭滴水了西湖

賈泳

題安生僧寺

重來已是五年游
憂國相仍欲白頭
翻羨亭亭兩奇樹
不知風雨過春秋

姚孝錫

花前獨酌

老將花酒作知音
起就花前酒自斟
莫便興來先酩酊
却妨真賞費搜吟

移得名花手自栽
花知不為老人開
興來誰是尊前客

卷十八
惟有提壺送酒杯

題柳溪別墅

雨霽風和不動塵
柳邊攜酒賞晴春
頻來溪鳥渾相識
渡水穿花不避人

晁會

杜鵑

杜宇啼聲枕上來
一聲哀似一聲哀
千哀萬怨無今古
喚得行人若箇迴

張大節

同新進士呂子成輩宴集狀元樓

鸚鵡新班宴杏園不妨老鶴也乘軒
龍津橋上黃金榜
三見門生是狀元

施宜生

柳

魏王堤暗雨垂垂還似春殘欲別時
傳語西風且停待
黛殘黃淺不禁吹

無題

唱得新翻穩貼腔
阿誰能得肯雙雙
天寧寺裏尊前月
分擘清寒入小窗

盆池

盆池瀲灩蔭芭蕉
點水圓荷未出條
分得江湖好風景
斷雲飛去晚蕭蕭

平陽書事

春寒窸窣透春衣
沿路看花緩轡歸
穿過水雲深密處

馬前蝴蝶作團飛

李晏

高麗平州中和館後草亭

藤花滿地香仍在松影拂雲寒不收
山鳥似嫌遊客到一聲啼破小亭幽

白巖山

白巖寺羣山環抱邨落相望亦奇觀也惜乎無水因作絕句書石

只有山光無水聲我疑神物固巖扃
如何鑿得飛泉出當為山僧叱六丁

卷十八
山寺尋春春已歸紫梅猶有折殘枝老僧兀坐如枯木
花謝花開總不知

五龍祠禱雨

麥槁禾焦厭火雲引觴潛禱五龍神君能借我青驄馬
傾倒天瓢濟此民

董師中

自臨洮還

臨潭仍是漢家城積石相望十驛程西略河源東並海

此身何地不經行

蔡珪

葵花

北墉開處葉森森
政以多花負賞音
小智區區能衛足
孤忠耿耿祇傾心

讀史

伯陽名節世人知
太史成書未免譏
不是道家齊物我
豈容同傳著韓非

閭山

西風絕境撫孤松千里川原四望通
但怪林梢看鳥背不知身到碧雲中

十三山下邨落

閭山盡處十三山溪曲人家畫幅間
何日秋風半篙水小舟容我一蓑閒

暮春

陌上歌聲枕上聽秋千梧影兩亭亭
春風三月正花好

曉日一竿初酒醒

即事

竟日開編樂有餘
古人妙處不欺予
胃中更著五千卷
未到漢家城旦書

燕山道中三首

欵段乘涼未五更
徐河十里霧中行
前邨煙樹望不見
欲到忽聞雞犬聲

獨輪車重汗如漿
蒲結芒屨亦販商
我是行人更憐汝

却應達者笑予狂

燕南趙北困風埃
投宿雲居眼暫開
明日都門選官路
逢人羞道見山來

太白捉月圖

寒江覓得釣魚船
月影江心月在天
世上不能容此老
畫圖常看水中仙

雪谷早行圖

冰風刮面雪埋屋
客子晨征有底忙
我欲題詩還自笑

東華待漏滿鞞霜

華亭圖

頭無片瓦足無土不犯清波過一生釣得金鱗便歸去
依然明月大江橫

初至洛中

水北醑醑半欲芳長條十丈更餘長春風得得憐羈客
借與窗櫳六日香

劉汲

高陽道中

杏花開過野桃紅
榆柳中間一徑通
禽鳥不呼邨塢靜
滿川煙雨淡濛濛

家僮報西巖栽植滋茂喜而成詠

孤雲出岫本無心
何用微名挂士林
近日故園消息好
西巖花木已成陰

蒲縣下庫邨留題二首

山城無事早休衙
閒逐東風看落花
行處不教呼喝鬧

恐驚林外野人家

古柳長楸倚翠微
水光嵐氣襲人衣
清閒歲月無多事
事簡何妨倒載歸

劉瞻

春郊

桑牙粒粒破春青
小葉迎風未展成
寒食歸寧紅袖女
外家紙上看蠶生

無極道中

銀河淡淡瀉秋光
缺月稍稍挂晚涼
馬上西風吹夢斷
隔林煙火路蒼茫

所見

傾歌石片插漣漪
上有蕭蕭楊柳枝
藻荇半浮苔半濕
浣紗人去不多時

王寂

沁水山寺

兩峽山高月半輪
五更人起馬嘶頻
無端又上長安道

輸與僧窓飽睡人

雷思

食松子

千巖玉立盡長松
半夜珠璣落雪風
休道東遊無所得
歲寒梁棟滿胸中

題王官谷天柱峰

一峰凝碧倚晴空
一水縈紆一徑通
中有幽人從說古
誰知高興與今同

題藏洞

仙人愛茹紫芝香
占得中條最上方
何事紅塵飛不到
幽居常被白雲藏

宋楫

還紫雲寺素扇且題詩其上

吳綾便面小團團
失手拈來亦厚顏
障盡驛塵三十里
却還明月紫雲間

庭槐

庭槐先人手所植再世清陰方滿臺慚愧兒孫種桃李
花枝準擬當年開

鄭子聃

即事

一錢不值程衛尉五斗解醒劉伯倫
讀罷離騷解衣卧
門前花柳自爭春

張萬公

戊戌二月中旬登稷山清榭

問囚推案朝還暮危坐不知春淺深今日檐間看風色
一株紅杏暗驚心

趙可

雲興館曉起

雙旌晚泊雲興館對面高峰絕可人一夜山雲飛作雪
要誇千樹玉璘珣

江路聞松風

雪裏雲山玉作屏松風入耳細泠泠朝來醉著紅亭酒

却被髯龍喚得醒

郝俟

疊翠樓

畫樓西畔石州山
指點雲煙識翠鬟
回首十年真一夢
淡如天水夕陽間

題均福堂三首

憧憧車馬競春遊
不見溪堂五月秋
卧聽雲濤春午枕
夢隨鷗鳥落沙洲

為魚為鳥知誰是
看水看山俱得意
存亡貴賤聽天公
只有歸家須早計

歸休得計早歸來
林下空言只可咍
莫待山林嫌俗駕
却將鞍馬覓塵埃

魏處士野故莊

郊原冷落霜風後
桑柘蕭條兵火餘
試問當時卿與相
幾家猶有舊田廬

任詢

濟南黃臺三首

滿目江南煙水秋
濟南重到憶南遊
便欲移家漁市側
輕蓑短棹弄扁舟

柴扉水際晝還扃
落日城頭晚更明
深綠淡黃洲渚冷
敗荷無數似臨平

綠柳橋邊簇錦鞍
紅紗影裏照煙鬟
歸來書几高燒燭
渾似江鄉一夢間

巨然山寺

孤撐山作碧螺髻漫散水成蒼玉鱗野寺荒涼人不
到水光山影正橫陳

馮子翼

佑德觀試經

琳館清深小雪殘釀梅天氣不多寒客窗竟日無人到
只有蕭蕭竹數竿

劉仲尹

寒夜

漏聲穿竹夜霜清。儘著功夫伴短檠。睡足梅花半梢月。
虛徐老鼻學香生。

墨梅一十首

錄六首

生憎施粉與施朱。換骨元都亦自殊。疎影冷香題不到。
夢驚煙雨暗西湖。

趙郎愛香人不知。羅浮山下有佳期。春寒徹骨角聲起。
才記參橫月墮時。

君王鳳駕九龍池。後輦傳呼召雪兒。狼藉玉臺銀燭暗。

丁香小麝印宮眉

鐘鼓沈沈度苑牆
玉繩初直殿東廂
荀妃早發雞鳴埭
殘月微分燭下粧

衡州何處問花光
抹月批風只欠香
安得江南腸斷句
為題風雨浣啼粧

古絹誰藏謝女真
天寒翠袖一招魂
江山嫁盡風流夢
雪滿冰溪月挂邨

自理

日日南軒學蠹魚，隱中獨愛隱於書。
兒癡婦笑謀生拙，不道從來與世疎。

窗外梅蕾二首

玉兒秀穉雲幄藏，鼻觀已覺鉶水香。
過眼空花均一寓，十分春色屬秋堂。

細蕾初看柳麥肥，春風得得遶窗扉。
道人方作玉溪夢，石塢竹橋風雪飛。

初秋夜涼

小蟲機杼月西廂風雨纔分半枕涼白髮自疎河漢夢
一鉸秋水玉簪香

夏日

牀頭書冊聚麻沙病起經旬不煮茶更為炎蒸設方略
細烹山蜜破松花

不出

好詩讀罷倚團蒲唧唧銅鉸沸地爐天氣稍寒吾不出
鐸鍤分坐與狸奴

一室

老來湖海愧陳登
只有頭鬚未是僧
坐對黃昏鐘鼓定
竹根吹火上吟燈

梅影

五換嚴更三唱雞
小樓天淡月平西
風簾不著闌干角
瞥見傷春背面啼

路仲顯

楊秘監釋迦出山像

自從此老出山隅
惱亂蒼生底事無
他日若逢楊處士
只教畫箇涅槃圖

張汝霖

春溪一首

黯黯春愁底處消
小桃無語半含嬌
東風不管前溪水
暖綠溶溶拍畫橋

元日能

紅梅

天上瓊兒白玉肌
吳粧略約更相宜
認桃辨杏由君眼
自有溪風山月知

魏道明

退食

竿頭犢鼻清貧在
夢裏槐安舊習空
退食歸來澹無事
水邊長嘯看晴虹

史旭

臨真上元夜雪

斜風吹雪滿山城
壓屋雲低未肯晴
天女散花春一色
燭龍銜照夜三更

早發索駝棚

郎君坐馬臂彫弧
手撚一雙金僕姑
畢竟太平何處用
只堪粧點早行圖

梨花

少年攜酒日尋花
老去花前欲飲茶
今日傳觴似年少
一枝香雪上烏紗

張庭玉

即事

烏鳶繞樹山梨熟
蝴蝶穿花木槿開
赤脚城中借書去
蒼頭原上負薪來

宗道

寶巖僧舍

寂寂鐘魚柏滿軒
午風輕颺煮茶煙
西堂竟日無人到
只許山人借榻眠

鮮于溥

早發

燈前夢斷家千里
馬上詩成月一痕
晨粥未烹官路遠
隔林煙火是漁邨

陳君可

梅影

隔窓疑是李夫人
江月多情為返魂
不似丹青舊顏色
十分憔悴立黃昏

劉仲傑

登陶山寺

遺跡千年事恐誣幽棲誰信為陶朱不知古寺東山洞
曾與西施共隱無

趙文昌

歌扇

媚娘巧作貫珠喉畫扇團團半掩羞唱到春山小顰處
一輪明月為花愁

御選金詩卷十八

謹案卷十七第三頁前八行草樹秋容失刊本失訛失據中州集改

卷十八第二頁前五行海山星月總關情刊本星作新據中州集改

第五頁後二行手持禁鑰千門肅刊本鑰訛約據中州集改

第七頁前六行清如南國初蘭客刊本客訛色據中州集改

第十七頁後六行石麟蒼蘚卧田桑刊本麟訛鱗

據中州集改





總校官庶吉士臣侍朝

校對官檢討臣蕭九成

謄錄監生臣劉天蒼

欽定四庫全書薈要

集部

御選金詩卷

十九
二十

詳校官原任主事_臣李斯咏

欽定四庫全書薈要卷一萬八千四百五

集部

御選金詩卷十九

七言絕句二

孟宗獻

柳塘

搖搖風影上寒塘
靜裏亭臺日月長
不似隋家堤岸上
亂鴉殘照管興亡

蘇門花塢

繞舍雲山慰眼新
看花差後洛陽塵
從君小築繁香塢
不負長腰玉粒春

趙攄

早赴北宮

蒼龍雙闕鬱層雲
湖水鱗鱗柳色新
絕似江行看清曉
不知身是赴朝人

高有鄰

絕句

事去君王不奈何
荒墳三尺馬嵬坡
歸來枉為香囊泣
不道銀河淚更多

許安仁

望少室

名山都不見真形
萬仞盤盤入杳冥
安得雲間騎白鶴
下看三十六峰青

送二道者歸汾州

介休山下兩閒人
來訪汾陽舊使君
明日却歸塵外去

一雙白鶴上青雲

少室道中

少室峰頭曉月沈
千家城郭淡陰陰
五更雞唱殘星滅
馬上看山過少林

遊泰安竹林

蕭寺天教勝處安
峰巒騰擲水雲閒
客來總說遊山好
不道山僧却厭山

党懷英

立春

水結東溪凍未漪
風凌枯木怒猶威
不知春力來多少
便有青蠅負暖飛

端午日照道中

幾年客舍逢端午
今日東行復海隅
三歲已無平老艾
一杯聊作辟愁符

睡覺門外月色如晝
霜風過琴然成聲作一絕
老木經霜衆竅空
月明深夜響秋風
始知天籟非人籟

吹萬由來果不同

題馬賁畫鸚鵡圖

雙眠雙浴水平溪
共看秋光卧兩堤
誰信瀟湘有孤鴈
冷沙寒葦不成棲

和元卿郊行

馬駛車驅起路塵
傍山陰翳作春溫
東風欲放萌芽動
已有疲牛齧燒痕

駒山道中

三年三到水雲鄉
瘦馬凌兢怯路長
野雪未乾春未雨
落鷺飛起暗塵黃

吳歌楚語海山間
織葦苫菰便自安
已作稻塍猶未種
小溝流澀水車乾

海路東南萬壑傾
青山孤起壓重城
驛亭春半餘寒雪
牆角無人草自生

白莊道中

暖風遲日弄春晴
渾似龍眠畫裏行
沙路半隨堤尾曲

幾家桃李鶉鳩鳴

花品

翠裙襞積破黃薇新樣丁香結玉蕤最愛東風木芍藥
淡紅深紫兩相宜

上皇書扇後

便面團圞字點鴉天風吹隋委塵沙燕泥庭草爭工拙
何似當年陌上花

漁村詩話圖

江村清境皆畫本畫裏更傳詩語工漁父自醒還自醉
不知身在畫圖中

曉雲次子端韻

灤溪經雨浪生花曉碧翻光漾曉霞川上風煙無定態
盡供新意與詩家

日照道中

路轉清溪樹蔚然解鞍坐愒午陰圓避人鷗鳥驚飛盡
時有游魚弄柳綿

李獻可

清水寒食感懷

桃花零落柳成陰人到春深思更深芳草成樓天不盡
異鄉寒食故鄉心

召還過故關山

過關天日正清明誰道山神不世情遠客得歸心緒別
隴隴間作斷腸聲

趙承元

探春

冰底流泉匹練飛
麴塵著柳不禁吹
杖藜恰到春生處
已有人家插酒旗

劉迎

歸來圖戲作

雲髻春風一尺高
笑攜兒女候歸橈
情知一首閒情賦
合為微官懶折腰

過關渡水圖

短車無復駕青牛散策方來對白鷗煙水從容許君獨
暫須分我一船秋

張萱戲嬰圖

犀顱玉頰寧馨子霧鬢雲鬟窈窕娘三十年前大門日
憶觀羣戲碧方牀

河橋

桃李香中八九家青旗高挂綠楊斜晚來風色渡頭急
滿地蕭蕭楊白花

孫鐸

癸亥清明日

脩然一室暗塵凝
兀兀端如打坐僧
習氣未除私自笑
短檠還對讀書燈

王庭堅

野菊

鬪雞臺下秋風裏
白白黃黃無數花
日暮城南城北道
半隨榛棘上樵車

王庭筠

曲水亭

山陰禊事記蘭亭珠玉琳琅照眼明
曲水至今無好客
一觴還自契幽情

八月十五日過泥河見鴈

家在孤雲落照間
行人已上鴈門關
憑君為報平安信
才是雲中第一山

大安寺試院中寒食

東風日日漲黃沙
供佛床頭始見花
寒食清明好時節
年年憔悴獨離家

獄中見燕

笑我迂踈觸禍機
嗟君底事入圜扉
落花吹濕東風雨
何處茅簷不可飛

偕樂亭

日暮西風吹竹枝
天寒杖屨獨來時
門前流水清如鏡
照我星星兩鬢絲

野堂二首

綠李黃梅繞屋疎秋眠不著鳥相呼
雨聲偏向竹間好
山色漸從煙際無

雲自知歸鳥自還一堂足了一生閒
門前剝啄定佳客
簷外孱顏皆好山

韓陵道中

石頭犖确兩坡間不記秋來幾往還
日暮寒驢鞭不動
天教仔細數前山

夏日

西窗近事杳如夢
北客窮愁日抵年
花影未斜猫睡外
槐枝猶顫鵲飛邊

送子貞兄歸遼陽

青峭江邊立數峰
煙梳雨沐為誰容
到門為向山靈道
歸意如君一倍濃

微行入麥去斜斜
才過深林又幾家
一色生紅三十里
際山多少石榴花

夏日

檀欒倒影硯波清
注了黃庭譜鶴銘
且喜過門無穠穢
却憐浣壁有寧馨

劉賓客詩寧
字平聲呼

河陰道中

梨葉成陰杏子青
榴花相映可憐生
林深不見人家住
道上唯聞打麥聲

題林慮

帝遣名山護此邦
千家瑟瑟嵌西窓
山僧乞與山前地

招客先開三十雙

題黃華四首

挂鏡臺西挂玉龍
半山飛雪舞天風
寒雲直上三千尺
人道高歡避暑宮

道人解后一開顏
為借筇枝策我孱
幽鳥留人還小住
晚風吹破水中山

手拄一條青竹杖
真成日挂百錢遊
夕陽欲下山更好
深林無人不可留

王母祠東古佛堂人傳棟宇是隋唐年深寺廢無人住
滿谷西風栗葉黃

王萬慶

歲寒三友圖

黃華山中夜氣清月明風定聞吹笙梅花開向竹松裏
雪香零亂墨光生

王明伯

偶題

釣鰲公子鐵心胸興在三山碧海東千尺雲帆已高揭
不知何日得秋風

趙之傑

許道寧羣峰暮雪

道士平生林野人醉中拈出雪峰真為君療却煙霞癖
比似青囊藥更神

題濟源龍潭寺

樹圍脩竹竹圍庵菴下泓然碧一潭極目荷花半秋色

小橫圖上看江南

趙鼎

宿來同堡

渭北洮南過却春窮邊冰雪更愁人來同驛裏題詩處
破屋青燈一病身

毛麾

無題

小顰對起石州山楊柳分青入髻鬟乍識春風眼如鵲

為誰無語獨凭闌

張行簡

六月二十九日北宮朝回

疎柳哀荷又一時清波飛葉夢靈芝
年年踏盡溪邊路
不覺吳霜點鬢絲

酬郭光秀才

疇昔君來事已睽豈知今我又羈棲
波臣倘不辭升斗
鵠卵終當遇魯雞

題子端雪溪小隱圖

出處皆天豈自由仙標終合冠鰲頭不妨貌取黃華景
時向鈴齋作卧游

張行中

右丞文獻公所畫張果像

古來人物畫為難驚見仙公樹石間莫把丹青名右相
太平勲業在人寰

趙颯

晚宿山寺

松門明月佛前燈
菴在孤雲最上層
犬吠一聲秋意靜
敲門時有夜歸僧

和茂才韻

十年為客未還家
贏得參參兩鬢華
別後故人應念我
不來踏雪看梅花

留題西溪三絕

誰開玉鑑瀉天光
占斷人間六月涼
日落沙禽還未散

也知受用藕花香

波光湛碧冷無痕眇眇輕風起縠紋認得朝來疎雨過
却因水底見飛雲

總道西溪畫不如豈知造物用工夫蟾光忽作靈犀透
表裏通明兩玉壺

寓居寫懷

平陸溫風雪半消孤煙籬落隔溪橋赴虛人去林臯靜
時有晚鴉銜隋樵

路鐸

細香軒三首

花氣爐煙總不同
嚙香噴翠小窗風
中邊故嗅渾無有
心跡相忘忽暗通

閣雨含風戶牖涼
聞機纔發興何長
無心孤竹那能尔
自是詩人知見香

霜雪青青玉一叢
肯從桃李借薰醲
不知香界何從立
憑仗清風問籀龍

華清

聲華小陸自雲間
疇昔聯鑣到此山
痛憶青溪對牀夜
卧聽虛壑瀉潺湲

年來萬事總灰心
但看清泉與茂林
山樂聊須攜往賞
肩輿同入翠微深

夜夢故妻說身後
為護蘭童子住
翡翠菴作詩
紀之

翡翠菴前花草香
護蘭童子淡雲妝
宿緣却了三生債

不道未歸人斷腸

劉昂

醉後

禪僧勸讀傳燈錄
道士教行進火功
今日興來俱破戒
黃花離落醉西風

山中雨

嵩高山下逢秋雨
破繖遮頭過野橋
此景此時誰會得
清如窗下聽芭蕉

客亭

折盡官橋楊柳枝
春風依舊綠絲絲
啼鶯為向行人道
離別何時是盡時

贈張秦娥

遠山句好畫難成
柳眼才多總是情
今日衰顏人不識
倚爐空聽煮茶聲

二頃山田半欲蕪
子孫零落一身孤
寒窗昨夜蕭蕭雨
紅日花梢入夢無

即事

雨洗明河畫扇收
胡牀露冷藥闌秋
牆陰未得中庭月
一點螢光草際流

山花山雨相兼落
溪水溪雲一樣閒
野店無人問春事
酒旗風外鳥關關

歌風臺

劉項興亡轉燭過
亂蟬吟破漢山河
長陵卧老咸陽月
沛上猶傳擊筑歌

王官谷二首

潛溪時照塵埃客微雨不遮天柱峰斜日落花人去盡
澹煙樓閣數聲鐘

簿書期會敢遷延輶輶城樓借榻眠咫尺王官未能去
俗緣妨我愛山緣

周昂

送李天英下第

不須寂莫恨東歸洗眼三年看一飛試卷波瀾入毫穎

莫教歐九識劉幾

宋文貞公廟

開元四荒不動塵
柱石中原有老臣
襄土一丘松柏暗
長安三日荔支新

讀陳後山詩

子美神功接混茫
人間無路可升堂
一斑管內時時見
賺得陳郎兩鬢蒼

偶書

幽陰不放終年樹好味仍餘盡日茶詩業未降心有種
世緣初盡眼無花

失子

白髮飄蕭老病身幾因兒女淚沾巾虛談誤世王夷甫
只有情鍾語最真

西城道中

草路幽香不動塵細蟬初向葉間聞溟濛小雨來無際
雲與青山淡不分

醉經齋為虞鄉麻長官賦

詩書讀破自融神不羨雲安麴米春
黃卷至今真味在
莫將糟粕待前人

孫資深歲寒堂

世態浮雲日夜移春蘭秋菊各爭時
此心鐵石無人會
惟有庭前柏樹知

晚望

煙抹平林水退沙碧山西畔夕陽家
無人解得詩中意

只有雲邊數點鴉

有感

壯心未分逐流年
衰鬢從渠衆目憐
却恨詩情消減盡
語言枯淡到中邊

即事二首

不堪華髮半頭生
老去偏添愛嫖情
新得家書來報喜
舊時龜子遶牀行

一牀安置似僧居
白髮忘梳動月餘
懶性漸成愁把筆

小詩常擬倩人書

春日即事

凍柳僵榆未改容
狐裘貂帽尚宜風
欲尋把酒渾無處
春在鳴鳩谷谷中

即事二首

南苑霓旌動繚牆
天街蓮燭照脩廊
斗南絳氣風吹盡
小雨濛濛濕建章

楊花顛倒入簾櫳
睡鴨香殘碧霧空
盡日尋詩尋不得

鷓鴣聲在夢魂中

代書寄大元伯

南園臘蟻記同傾一紙書來萬里情
日夜愁心隨柳色
東風吹滿大梁城

正月大風雨

風如渤海勢凌虛
寒破貂裘力尚餘
不是化工難倚賴
也知青帝有驅除

靳子溫款春亭

曾數花鬚傍藥闌春風不到酒杯寬
自憐白首荒三徑桃李年年擔上看

寒林七賢

苦寒如此欲何之雪帽風裘意自奇
縱有清詩三百首未應肯得黨家兒

魯直墨跡

詩健如提十萬兵東坡真欲避時名
須知筆墨渾閒事猶與先生抵死爭

讀柳詩

功名翕忽負初心行和騷人澤畔吟
開卷未終還復掩
世間無此最悲音

王礪

寓居南村

朝來出門無所適野徑雨晴沙不泥
鼓笛誰家賽春社
杖藜隨過柘岡西

雜詩

陰陰綠樹暗庭除
散盡鳴禽靜有餘
獨對爐薰坐終日
會心惟有漆園書

瓦爐拍子細煙消
閒讀禪經破寂寥
風細月高人已靜
隔窓疎竹夜蕭蕭

晴日南溪物色饒
草芽新綠凍全消
金絲柳底洲沙沒
數尺流波拍野橋

南畝東臯春務時
田家候雨罷耕犁
却汲井泉澆藥圃
更疏陂水灌麻畦

竹繞沙村水漫流
鷓鴣鷓鴣對沉浮
一竿便擬從漁父
卷置琴書買釣舟

屋頭叢木撼蒼煙
風卷飛花到枕邊
南寺有僧來問字
打門驚覺午窗眠

漢梁王苑古臺西
秋思紛紛獨杖藜
雲雁高城鴈飛盡
一聲寒角夕陽低

楊邦基

墨梅

粉蝶如知合斷魂啼粧先自怨黃昏花光筆底春風老
寂寞嶺南煙雨痕

蕭貢

渭南縣齋秋雨

穴牀撐拄小窗前一點青燈照不眠
簷溜琤琮風淅瀝嫩涼如水夜如年

自感

形骸付與甄陶外禍福難防倚伏前
孔雀若知牛有角

應須忍渴過寒泉

荒田擬白樂天

荒田幾歲闕人耕
欲種糜蕎趁晚晴
急手翦除荆與棘
一科才了十科生

楊侯畫晉公臨江賞梅
樂天與鳥窠禪師汎舟
談元不顧而去戲為一絕
以代晉公招樂天同
飲云

明粧冷蕊兩清新
面頰浮光數爵頻
拭風前寒鼻液

快來同醉雪中春

真容院

魔宮佛界等空虛此理何曾屬有無
直向臺山始相見
可中還有二文殊

讀火山瑩禪師詩卷

長短都歸一夢中
身前身後兩無窮
李愷信士今如在
定向江湖訪澤公

陳宮詞

三閣花深白晝迷
酒催狎客賦宮詞
管絃散落春風外
一曲金釵兩鬢垂

寄嵐

寄嵐地勢橫三汊
河朔城墉挂一箕
紫塞高連寒日短
黃榆落盡長年悲

按部道中二首

窟野河津水沒腰
管岑官路雪封條
一年樂事能多少
強半光陰馬上消

寒城睥睨插山隅
秋半霜風塞草枯
月轉譙樓天未曉
角聲吹徹小單于

日觀峰

半夜東風攪鄧林
三山銀闕杳沉沉
洪波萬里兼天湧
一點金烏出海心

後趙

擬倫人物指高光
可笑梟雛不自量
正使成名皆豎子
英雄也未到君行

李仲畧

嗅梅圖

朧朧霽色冷黃昏
缺月疎籬水外村
人在天涯花在手
一枝香雪寄銷魂

蓮塘陪諸公賦

潦倒何堪接俊遊
神仙空羨李膺舟
官曹只在空湖畔

簿領如山屋打頭

省幕在城外
極卑陋故云

宗端脩

漫書

冷面宜教冷眼看只慙索米向長安
陰崖何限枯松樹望見屏幃盡牡丹

趙秉文

春遊三首

無數飛花送小舟
蜻蜓款立釣絲頭
一溪春水闌何事
皺作風前萬疊愁

樹藏脩竹竹藏門
門外清流幾股分行過
小橋人不見

背陰花氣隔牆聞

煙外絲絲風柳斜春光也自到天涯
太平有象村村酒
寒食無家處處花

暮歸

貪看孤鳥入重雲不覺青林雨氣昏
行過斷橋沙路黑
忽從電影得前村

清居寺五杉亭觀子野留題

五杉今日只三株曾是詩人歎息餘
君去我來杉尚在

斷腸君沒見君書

倣嚴武臨邊

少年騎馬耳生風老去羞無汗馬功
落日秋風心尚壯
令人回首望雲中

和韋蘇州荅中山道士

行轉清溪又別峰馬蹄終日認樵蹤
翠微深處無人住
寺在深山何處鐘

馬邑

天外亂山圍曠野水邊孤塔背層城馬頭才指桑乾路
愁見行人問去程

雞鳴山

煙蒸山腹晴猶濕河帶冰澌暖漸流獨上雞鳴看日出
五雲多處是皇州

盧溝

河分橋柱如瓜蔓路入都門似犬牙落日盧溝溝上柳
送人幾度出京華

北都小雪

邊城小雪試年華
煙冷貌貅十萬家
探使不來人半醉
將軍氍毹草平沙

雨晴二首

東風時送瓦溝聲
欹枕幽窓夢自驚
睡起不知雲已散
夕陽偏向柳梢明

一抹平林媚夕暉
山煙漠漠燕飛飛
倚闌遙認天邊電
何處行人帶雨歸

和舜元雜詩

瘦馬龍鍾兩鬢華
敲門避雨野人家
門前籬落猶懸露
十里晚風吹斷霞

三五殘星闕角東
澹黃楊柳月明中
貪看稚子收殘葉
駐馬天街滿袖風

撫州

蕭寺金風動剎竿
西城北斗挂闌干
一蟲不響夜更靜
片月未高山已寒

燕賜城邊春草生
野狐嶺上斷人行
沙平草遠望不盡
日暮惟有牛羊聲

北苑寓直

柳外宮牆粉一圍
飛塵照面捲斜暉
蕭蕭幾點蓮塘雨
曾上詩人下直衣

寓望

蒲根閣閣亂蛙鳴
點水楊花半白青
隔岸風來聞鼓吹
柳陰深處有園亭

戴花

病來杯酒懶重持強為花殘折一枝人老易悲花易落
東風休近鬢邊吹

玉堂

玉堂陰合冷窗紗雨過銀泥引篆蝸萱草戎葵俱不見
蜂聲滿院採槐花

夏直

玉堂睡起苦思茶別院銅輪碾露芽紅日轉堦簾影薄

一雙蝴蝶上葵花

湧雲樓雨

片雲頭上一聲雷
欲到冠山風引迴
宵外忽傳林葉響
坐看飛雨入樓來

簾雨風斜不上鉤
闌干吹濕怕人愁
雷聲驅雨東山去
指下斜陽恰半樓

中秋日郊外遇雨

斜風吹雨水生寒
荷蓋傾珠下芡盤
驚起鷺鷥眠不得

金方四月
卷十九
衝煙飛過蓼花灘

華山

石頭犖确水縱橫過雨山間草屨輕未到上方先滿意
倚天青壁看雲生

濟源四絕

歌管年年樂太平而今鉦鼓替歡聲裴公祠下無窮水
好乞餘波為洗兵

祠前繚繞無窮水竹杪參差不盡山極目水窮山盡處

天壇猶在白雲間

樹映樓臺水映空
溪容林意兩溶溶
夏山如醉無人畫
遠處微茫近處濃

參參雲木曉相參
寺枕龍蟠十頃潭
一徑通幽竹深處
居人似指侍中菴

雨晴

一春不雨漫塵黃
碧瓦朝來泛霽光
留得紫葳花下露
幾招渴燕下雕梁

蟬

薄薄秋雲兩翼輕
淤泥脫迹更恢聲
可能枵腹涼陰底
受盡人間風露清

即事

樓頭不見暮山重
遙認青林雨意濃
一陣風來忽吹散
斷雲還補兩三峰

金水河

金水河邊駐馬時
熙春閣外夕陽微
舊時同樂園前水

曾照寒鴉幾度歸

晚登太史臺

雲鏤殘陽一綫金
西風吹雨破層陰
歸鴉時有紅翻背
返照依依在遠林

市橋落日與波平
返照前灣別舸明
不覺城頭來暝色
回看天際暮煙生

同樂園二首

春歸空苑不成妍
柳影毵毵水底天
過却清明遊客少

晚風吹動釣魚船

石作垣牆竹映門
水田山複幾桃源
毛飄水面知鵝柵
角出牆頭認鹿園

載梅

滿車飽載梅花共
車聲幽幽不成弄
月落參橫畫角哀
橫眠正作梅花夢

遊崆峒四絕

西鄰鳥鼠北朝那
涇水東流入大河
一上參雲亭上望

山川滿目夕陽多

金湯形勝滿秦中戰鼓驚飛北塞鴻為向崆峒山試道
可能高枕聽松風

斷碑零落任苔封想像當時問道宮煙鎖洞天三十六
時人空禮白雲中

萬松聲裏暮濤寒盡在參雲一望間只欠懸流二千尺
天風吹下翠屏山

繫舟山圖

裕之先大夫嘗
居此山之東巖

山頭佛屋五三間山勢相連石嶺闢名字不經從我改
便稱元子讀書山

虎牢

兩崖峽束枕洪濤自古英雄爭虎牢蒼天胡為設此險
長使戰骨如山高

史公奕

李鴈門

天下三分二屬梁區區獨木欲支唐錦囊三天傳遺恨

不救朱三著蘋黃

朱瀾

黃筌雀蝶

飢雀喧爭蛺蝶孤錦城宮闕見丘墟老筌妙意誰知解
丹粉圖中有諫書

宮詞

太一芙蓉上下天秋波澹澹白生煙採蓮宮女分花了
笑把蘭篙學刺船

張穀

石淙

天后離宮在崧山曲河即東坡為韓子華賦詩處也

潁水洗餘高士耳是非猶恐汚人牛區區武媚何為者
水上磨崖紀宴游

張翰

奉使高麗過平州館

昨日龍泉已自奇一峰寒翠壓簷低兼并未似平州館
屋上層巒屋下溪

金郊驛

山館蕭然爾許清
二更枕簟覺秋生
西窗大好吟詩處
聽了松聲又雨聲

呂子羽

李白醉歸圖

春風醉袖玉山頽
落魄長安酒肆迴
忙煞中官尋不得
沉香亭北牡丹開

御選金詩卷十九